

四庫全書

子部

欽定四庫全書

通雅卷十五

明 方以智 撰

地輿

水注

論江之源別出吐蕃非止岷山也 江出岷山在今茂  
州汶山縣發源不一而濫觴甚微及閱雲南志則謂金  
沙江之源出於吐蕃之犁石南流漸廣至于武定之金  
沙巡司經麗江鶴慶又東過四川之會川建昌等衛以  
達於馬湖叙南然後合于岷江緬甸宣慰司志謂金沙

江闊五里餘緬恃以為險遠近大小言之江源出于吐蕃犁石即崑崙之南河出朶甘思即崑崙之西可畫守積石岷山已邪

禹貢九江為洞庭三江為漢岷彭 胡秘監旦晁詹事說之皆以九江為洞庭而鄭樵獨謂東匯澤為彭蠡東為北江入于海十三字為衍文朱子取之古九江郡乃在江北江漢往會之說味別之說洲別之說皆支經凡例曰考之過九江至于東陵者言導岷水而是水之橫

截乎洞庭之口以至東陵也是漢水過三澨之例也過  
九江至于敷淺原言導岷陽之水而導山之人至于衡  
山之麓遂越洞庭之尾東取小路至敷淺原也是導岼  
岐荆山而逾于河以盡常山碣石之例也漢志豫章領  
縣十八彭蠡縣下注云禹貢彭蠡澤在其西餘則言水  
入湖漢者八入大江者一而湖漢一水則又自雩都東  
至彭澤入江行千九百里山海經曰入江彭澤兩者本  
謂逕彭蠡縣之西而入江也語意不明耳漢志不知湖

漢之即為彭蠡又不知大江者亦溺于彭蠡又不知湖  
漢之為湖則皆承禹貢之衍疑而弗深考也智按導漾  
漢導江二條合觀之過九江至于東陵東匝北會為滙  
東為中江入于海則前條之北江豈衍乎禹治水詳于  
泛濶之處而南方為略從楊子言三江則漾漢為北岷  
江為中彭蠡為南不言南互見之矣胡晁九江指洞庭  
是而九江郡名即下流以稱之也滙言其合處也蕭該  
言彭蠡古作彭麗又按彭蠡一名宮亭九江三江別詳

于下

考河源者莫詳於元 河源出吐蕃朵甘思泉百餘泓  
淖弱不勝物從高視之燦若列星曰星宿海譯言火敦  
腦兒海也羣流匯二巨澤譯言阿刺腦兒也東行一日  
成川名赤賓河又行與亦里水合又與忽蘭水也里朮  
水合始曰黃河然水清又一二日程為九度河水八九  
段可度也又四日程水始渾濁土人抱革囊或乘馬  
過之亦有象舟傳革以濟繼是東以兩山廣一二里深

巨測矣又曰朵甘思東北鄙有大山積雪不消所謂崑  
崙也自九度至崑崙約計二十日程河行崑崙南半日  
程又四五日程至闊郎及闊提二地相屬又三日程始  
至哈刺別里赤兒崑崙之西人跡簡少多處山南又行  
五六日合細黃河與乞兒馬朮二水轉崑崙北二日程  
少東又北流半月程至貴德州州隸河州元所置吐蕃  
宣慰司也又四五日程始至禹貢所謂積石又五日程  
至河州安鄉關又一日程至打羅坑東北行一日合洮

河水又一日至蘭州過北卜渡至鳴河州過應吉里州  
正東行至寧夏南又東行即東勝也世言黃河九折彼  
地有二折蓋乞兒馬朮及貴德州必赤里也張騫曰河  
有兩源一出于闐一出于葱嶺唐薛元鼎使吐蕃得河  
源于悶磨黎山元太祖過九度渡在崑崙西南憲宗命  
弟旭烈征西域拓地四萬里而河源在域內至元庚辰  
世祖命招討使都實往通互市自河州行五千里抵河  
源還圖以聞又使其弟闊闊出闊闊回授學士潘昂霄



撰述而臨川朱思本于八里吉家得帝師所藏梵字圖  
書譯之

九河以近碣石者為是 舊曰馬頰即馬篤河徒駭即  
徒河在濟南境而胡蘇河簡河潔河皆在滄州漢得其  
三唐得其六歐陽志輿地記又得其一皆似是而非班  
固以滹沱為徒駭謬矣鄭氏乃曰齊桓塞九為一蔡九  
峰非之酈善長曰九河碣石苞淪于海程子宗之今碣  
石在海中去岸五百餘里則今之言九河故道者空穿

鑿矣

滎汴濟渠也

豫州之川滎

音滎

雒滎陽滎澤是也滎澤

與濟隧合出河之濟即陰溝之上原也康成曰今為平地滎陽民猶謂其地為滎澤鄭州圖經敖山在縣北滎陽在縣北四里酈道元曰濟水於此又兼邲春秋宣十二年晉楚戰于邲即是水也戴恂曰邲音卞則即汴水矣又作汴京相璠曰濟自敖山北溢為滎潴而後泄遂為汴水即禹貢道濟所謂東出于陶丘北而漢書地理

志注所謂狼湯渠首受沛東南至陳入潁過郡四行七  
百八十里者是也後世滎既不瀦又汴在戰國謂之鴻  
溝馬遷史記謂之滎陽漕渠漢書謂之狼湯渠漢建武  
中張泥修之謂之濟渠永平中王昊治之謂之浚儀渠  
酈道元謂之陰溝故名實遂難曉耳南豐曾氏曰昔禹  
於滎澤下分大河為陰溝出之淮泗至浚儀西北復分  
二渠其後或曰鴻溝始皇疏之以灌魏郡者是也或曰  
浪宕渠自滎陽五池口注鴻溝者是也或曰浚儀渠漢

明帝時循河流故瀆作渠渠成注浚儀者是也或曰石門渠靈帝時於敖城西北累石為門以遏渠口者是也石門渠東合濟水與河渠東注至敖山之北而兼汴水又東至滎陽之北而旃然之水東流入汴滎陽之西有廣武二城汴水自二城閒小澗中東流而出濟水至此乃絕桓溫將通之而不果者晉太和之中也劉裕浚之始有湍流奔注而岸善隕塞裕更疏鑿以漕運義熙之閒也皇甫誼發河南丁夫百萬開之起滎澤入淮千有

餘里更名之曰通濟渠者隋大業之初也裴耀卿言江南租船自淮西北泝鴻溝轉相輸納于河陰含嘉太倉等倉凡三年運米七百萬石者唐開元之際也後世因其利焉太宗嘗命張洎論著其興鑿漕運之本末如此宋至道之間也蘇氏曰自淮泗入河必道于汴世謂隋煬帝始通汴入泗禹時無此水道以疑禹貢之言此特人不攷耳禹貢九州皆記入河水道而淮泗獨不能入河帝都所在理不應爾意其必開此道以通之晉王濬

伐吳杜預與之書曰自江入淮逾於泗汴沂河而上振  
旅還都以濬舟師可知汴水大小非隋煬開創也陳後  
山曰漢末河入汭永平道至千乘入海而河之故瀆在  
新渠之南水經注所謂絕河而受索自此始隋因漢舊  
大業合河索為通濟渠入淮而故道竭今於畿為白溝  
於宋為沙於單為石梁於徐為汴而入於南清南清故  
泗也說文榮為小水無所見別作滌滌滢滢滢滢

沈沛即充濟滢亦沈也 沈即充濟亦作沛漢地理志

沛河惟兗州是也水經注俗呼為衍水山海經曰王屋之山澗水出焉漢書曰王屋之山沅水出焉李濂曰澗沅聲近也沅發源王屋山頂厓下既見而伏東出於孟州濟原縣有東西二源合流至溫縣是為濟水歷虢公臺西南入於河溢而出河之南為滎即滎波也又東出于陶丘北在今定陶縣又東至于荷又東北至壽張縣安民亭合汶水至今青州博興縣入海酈道元謂濟水當王莽之世川瀆枯竭其後水流逕通津渠勢改尋梁

鯀水不與昔同然則滎澤濟河雖枯而濟水未嘗絕流也程氏曰濟入河適會河滿溢出南岸溢出者非濟水因濟而溢故禹還以原名命之此解溢字亦通然河濁而滎清非河之溢明甚溢蓋指滎而言非指河也先儒皆以濟水性下勁疾故能入河穴地流注顯伏許慎引禹貢浮于淮泗達于荷音柯焦弱侯主此說南豐曾氏曰泰山北與齊東南諸谷水匯於黑水灣又匯於柏崖灣至渴馬厓下則泊然而止又至歷城西五十里有泉



湧出曰趵突泉人謂有棄糠于黑水灣者而見之于此  
蓋自渴馬之厓潛流地中而至此復出也其注而北則  
謂之灤水達于清河以入于海舟之通于濟者皆于是  
乎達也齊多甘泉其顯名者十數而色味皆同蓋灤水  
之旁出者也東阿井亦濟所經故膠能下鬲用攪濁水  
則清是濟之伏流乃物性程氏非之顧弗深考耳南北  
清河皆古濟流也會泗注淮者濟之至荷而分者也東  
北兼汶與同入海者濟之正派也今濁河已行南濟而

北濟自青州博興縣一百七十里至濱州入海增多漢  
百七十里宜禹迹之難考也荷澤在定陶東北曹州圖  
志濟陰南三里有荷水俗謂五丈河今名廣濟河說文  
以涕為沔濟而別載濟為出常山郡贊皇山東入泚想  
有同名者詩出宿于涕毛氏曰地名此又一涕也

蜀江甚多沔漢實二 孔安國曰漾水東流為沔與沔  
合至漢中為漢水是通稱也程氏曰水經叙漢自西樂  
城以上為沔以下為漢後人以南陽水為沔非也一曰

西流南流者沔東流者漢按漢武時有言從南陽入襄  
可漕此殆南陽之沔歟司馬徽居沔北非歟合溪曰岷  
江之外其水有七出于綿之神泉曰緜水出于什邡之  
章洛山曰洛水分流于永康之湔堰者湔水緜水自緜  
竹紫巖山逕德陽洛水自什邡入雒湔水逕導江崇寧  
九隴濛陽亦入雒三水皆合于雒自雒逕懷安簡資富  
順至瀘與江水會總曰內水發源於剛氏道微外會江  
油之清川逕緜潼遂東至於合曰涪水發源于沔之青

泥嶺逕大安利閭果至合與涪水會曰嘉陵水發源于  
小巴嶺逕巴蓬之伏虞西南以至於渠曰巴水出萬頃  
池逕明通又至渠與巴水合曰渠水巴渠二水既合逕  
廣安新明至合與嘉陵涪水會以達于渝而江始大此  
七水與江別合之大畧也由此入中國分名有三曰青  
衣曰羊山曰馬湖青衣出來山逕嚴道洪雅夾江而下  
羊山出鐵豹嶺逕漢源出嘉定之南與青衣水合入于  
江馬湖自譯都流至叙亦入于江其旁出于郡邑山澤

自岷至夔甚衆大者如盛山之萬頃池則驪流有四一入于渠三入於夔惟漢出嶓冢分流趨襄陽竟陵至漢陽後與江合此蜀衆水之大略也合溪猶未明江源出金沙而嘉陵之水即西漢即漾也胡文定曰欲固上流必保漢沔武侯築二城築漢城于沔陽樂城于城固即今漢中府城固縣洋縣皆城固地也漢與江合今曰漢口古曰沔口夏侯尚圍江陵使文聘別屯沔口止石梵自當一隊青龍後屬吳今漢陽府也王貢擊侃督護鄭

攀於沌陽又敗朱伺于沔口齊張仲傳梁王出沔口圍  
魯山即大別山沔左有郢月城沙羨縣治也黃祖所守  
夏口即魯口山簡奔夏口庾翼為荊州治夏口城據黃  
鵠磯邊江臨沔春秋時謂之夏汭吳黃武二年城沙羨  
音宜西角為磯樓名黃鶴沙羨即江夏也水經注夏水本  
江之別出自江陵東南流又東過華容又東至雲杜縣  
入沔謂之堵口冬竭夏流智按是夾港也何尚之曰夏  
口在荊江之中正對沔口智按此指夏口城即武昌也

魯肅呂蒙屯陸口在武昌蒲圻縣南即今蒲磯口也水

出下雋縣西三山溪

音轉

口者沱水上承新陽縣之太

白湖東南流為沱水逕縣南注於江曰沱口竟陵郡新

陽縣分雲杜立者也郭舒留屯沱口陶侃刺荊鎮沱口

陳侯安都討王琳至沱口後梁華皎與吳明徹戰於沱

口皆此地華陽志云漢二源東源出武都氏道漾山因

名漾禹貢漾流為漢是也西源出隴西嶓冢山會白水

經葭萌入漢戴氏曰有三源其一在興州三泉縣總之

漢因初源謂之漾因合沔而通謂之沔或謂之羌今沿漢水而東有寧羌州有沔縣又東有洋縣即古洋州也洋漾聲相近寧羌州漢之沮縣晉之武都也王伯厚斷以為一混矣戴說漢漾沔未明升菴曰蘇代謂漢中之甲出巴者源出西和州徼外經階沔與嘉陵水合閬水即漾水也浪漾亦通墊江出江谷澤經仇池出宕渠至巴郡入江智按桑欽叙漾漢而尾言西漢水又按鞏昌西和縣有嘉陵江故決之曰源出秦州之岷冢至重慶



江津縣之嘉陵江而入岷江者西漢水也所謂導漾為漢也出漢中府沔縣之嶓冢至漢陽大別山漢口入岷江者東漢水也所謂沔與漢合也漾至沮縣即為漢水沔水自出武都沮縣東狼谷中漢至鮒嶬山與沔合曰沮口沮縣今漢中略陽惟漾至沮為漢而沔又出于沮縣故言者混

外水即岷江內水即涪江中水即沱江 宋劉裕遣朱齡石伐蜀寇譙縱衆軍悉從外水取成都臧禧從中水

取廣漢老弱乘高艦從內水上黃虎史炤通鑑釋文曰  
巴郡今之重慶正對上水口右則涪內水左則蜀外水  
自渝上合州至綿州曰內水自渝上戎瀘至蜀謂之外  
水按外水即岷江自重慶上叙州嘉定是也內水即涪  
江自重慶上合州遂寧潼綿是也中水即沱江自瀘州  
上富順資簡金堂漢州曰四川者則取岷江沱江黑水  
白水四大川以為名爾沈約宋書資江為中水涪江為  
內水

它流曰沱潛曰潛 禹貢於梁州言岷嶓既藝沱潛既道于荊州又曰沱潛既道浮于江沱潛漢又曰岷山道江東別為沱水經曰江水自彭天關東逕汶關氏道縣北東別為沱漢志蜀郡郫縣禹貢沱江在西東入江蜀郡汶江縣沱江在西南東入江杜佑通典沱在濛陽郡唐昌縣鼂氏曰今永康軍導江縣西北二十里有沱江漢志水經所志之沱其源岷江是也自導江東南流至彭州永昌縣西為都江者杜佑所志之沱也自江都至

天勒山分而為二一名瀘水自天勒山十五里復合于都江一名廣濟江自天勒山東流至彭州九隴縣復合于都江自永昌之都江東南流至成都府郫縣北為郫江者漢志所謂禹貢沱江者也伯厚詩地理攷曰通典沱水在彭州唐昌縣今崇寧縣水經氏道江水東別為沱云開明之所鑿也郭景純謂玉壘作東別之標今茂州汶山縣梓潼張氏曰凡梁之山左皆曰岷右皆曰嶓出于岷者皆為江江之別皆為沱出于嶓者皆為漢漢

之別皆為潛凡此皆梁州之沱也漢志又曰沱出南郡枝江縣入江康成曰華容有夏水首出于江尾入于沔所謂沱也蓋以此為荊州之沱一曰與江別而復入於江曰沱此則有似于夾江特其首尾長耳建安蔡氏曰枝江之沱水入於江非出於江也承天府之潛江安慶府之潛山俱有潛水非首尾如夾江也沱潛之稱可謂難明矣詩江有汜江有渚江有沱沱潛汜渚皆為通名故訓潛為潛流沱為沱流謂與江別耳

五湖太湖也 史記正義舊太湖射貴湖上湖洮湖滬湖索隱與郭璞江賦注曰具區洮滬彭蠡青草洞庭或曰太湖與楚州射陽岳州青草潤州丹陽洪州宮亭此未確也水經注江南東注于具區謂之五湖口國語越伐吳戰於五湖范蠡返至五湖而辭越虞翻曰是湖有五道韋昭曰書謂之震澤爾雅謂之具區今名太湖或曰長塘曰射貴曰滬馮衍傳注曰滬洮射貴太以兼小支而得五名也或曰五灣曰游莫貢陵胥

九江洞庭也 禹貢釋文及尋陽地記以為烏白江蚌  
江烏江嘉靡江畎江源江廩江提江茵江張須元綠江  
圖以為三里江五州江嘉靡江烏上江白蚌江白烏江  
茵江沙提江廩江始于鄂陵終于江口會于桑落洲漢  
志在尋陽縣此皆泥在尋陽九派也太康地記曰劉歆  
以為湖漢九水入彭蠡水經云在長沙下雋西北胡氏  
以洞庭為九江曾氏謂過九江至於東陵東陵今之巴  
陵巴陵之上即洞庭也攷之前志沅水漸水辰水叙水

酉水澧水資水湘水皆洞庭楚人呼水皆為江揭衷熙  
曰以岷江至澧旁大水入江者為九江曰羊山曰青衣  
在嘉入曰金沙馬湖在叙入曰綿漾嘉陵曰北涪曰巴  
在重慶合入曰貴烏江合南涪以南入曰方湖之流北  
從巫峽入曰施南之水南從夷道入是也由今論之何  
不以鄱漢洞庭而并三夷水南北涪與巴嘉陵為九乎  
三江不一 孔安國云自彭蠡江分為三入震澤遂為  
北江而入海孔蓋泥彭蠡既瀦而牽合之也彭蠡震澤



入海各殊而三江豈可強同乎虞林猶持孔氏說與桑  
欽水經班固地理志相附而乃謂南江自牛渚上桐水  
過安吉歷長瀆出松江入海者則又謬甚矣郭景純以  
岷澍松為三江韋昭以松澍浦陽為三江亦疑孔安國  
之言而臆說邪酈道元引以為據何哉程大昌所進禹  
貢山川道里圖邊實所修崑山續志類訛承而舛踵之  
耳惟張守節曰三江在蘇州自西南至太湖曰松江自  
東南入白蜺曰上江亦曰東江自東北下三百餘里入

海曰下江亦曰婁江蓋得之矣吳地記與庾仲初揚都賦註朱長文吳郡續圖經其所言雖有詳略蓋皆本諸守節者也以今攷之太湖與吳江長橋東北合龐山湖者松江也又東南分流出白蜺入急水澱之山東而入海者東江也自龐山過大姚東北經崑山石浦安亭由青浦入海婁江也但澱湖之東流既塞而安亭亦失其故道久矣此單鍔所謂開白蜺安亭通龍鎮以入海者也王介甫云一江自義興一自毗陵一自吳縣皆小水

不合子瞻云岷江為中江漢為北江豫章為南江曾氏云北江中江皆禹所導南江乃其故道故經不之志余安慶亦號為三江口正謂合漢蜀豫章江也此吳幼清之說也以江行漢水彭湖水之中為中江人不達禹貢之文辭耳周禮職方揚州三江疏云江至尋陽南合為一東行至揚州入彭蠡復分為三道入海此謬極矣熙云按震澤居松江之上多震動禹貢既云三江既入遂云震澤底定則守節之論確矣

沂有二源 水經云沂出益縣艾山道元則曰沂有二源一出祚泉一出魚窮山又曰沂水北對稷門魯之城門也隔水為雲壇智按今蒙陰縣東北地名南河川小阜之下有曰狗泉此沂源也東南逕馬頭固山有泉東流與之合北望沂山五十里殊無別源據周禮沂山因水得名鄭玄齊儒不應有誤疑沂山水源古流今竭耳何振卿名山記沂山瀑數十丈

丹水有七 澤州高平縣有洺水一曰丹水漢上黨高

都縣莞谷丹水所出東南入沔水高都澤州晉城縣隋  
曰丹州漢丹水屬弘農郡以為白起坑趙卒水盡赤故  
曰丹水山海經洛水出謹舉山東與丹水合丹水出竹  
山洛合丹然後合尸水乳水蠱尾之龍餘水陽虛之玄  
扈水自謹舉至玄扈凡九山玉板曰倉頡為帝南巡登  
陽虛臨玄扈龜負丹甲青文之圖即此處也其內鄉縣  
之丹水乎水經注陰溝即狼湯渠亦名沔水又云丹泌  
亂流故沔兼丹水之稱又水經丹水出上洛冢嶺山至

丹水縣入於汧逕三戶城合於南陽之浙水其逕南鄉縣北所謂商於之地也呂覽曰堯有丹水之戰以服南蠻此水也竹書紀年曰宋殺其大夫皇緩於丹水之上是獲渠亦兼丹水之稱朱虛縣有東丹水西丹水出丹山今作凡山訛也夷水逕夷道縣合丹水水有赤氣故名

蘭溪有二 蘭溪在唐為兩縣名一屬蘄州沛水改為蘭溪一屬婺州杜牧之詩蘭溪春盡水泱泱蓋蘄州之

蘭溪也杜守黃州作此詩黃承蘭溪下流故耳

浯水有二 演繁露曰世傳浯溪元結自名之說文浯  
水出琅邪靈門壺山入濰則非元造矣程泰之獨不引  
淮南子之浯浯乎山東之浯乃吾山之水也吾山即魚  
山瓠子歌用之元次山之浯則在道州

漳有十一以清濁合流而名 趙晉之閒有清漳濁漳  
沮水逕當陽麥城與漳水合鞏昌有漳縣瀨上有漳水  
過豫章郡為章江漳州有漳浦亳州有漳水安州有漳

水即德安府大洪山之漳水此地漢稱豫章陳留過水  
逕城父縣沙水枝分注之世謂之漳水宜章有大小二  
章水存中以清濁相蹂者為漳章者文也別也漳謂兩  
物相合有文章且可別也清漳濁漳合于上黨當陽即  
沮漳合流漸上即漳湏合流漳州予未曾目見章郡即  
西江合流毫漳則漳渦合流雲夢則漳鄖合流此數處  
皆清濁合流色理如蟠螭數十里方混

洛水有九 蜀有雒縣雒水自章山至新都谷入湔蜀



都賦浸以縣雒職方氏雍州其浸渭洛易氏曰左馮翊  
懷德縣即彊梁原之洛水邊有園洛北條荆山在縣西  
正洛水源也孔安國注禹貢漆沮亦曰洛水出馮翊北  
又一洛水出慶州洛源縣有於白山洛水所出東流至  
鄜州洛交縣又東南流至京兆府雲陽東又徑同州澄  
城西北此皆非導洛自熊耳之洛也淮南地形訓洛出  
獵山注獵山在北地西北邊外洛東南流入渭詩云瞻  
彼洛矣是也括地志言出廣州一名漆沮至華陰南流

入渭王氏朱氏皆云詩之瞻洛尚是東都之洛也東都  
洛出弘農即上洛縣熊耳山水經謂出謹舉山至鞏縣  
入河此三洛矣水經注又廣漢泉出臨洮西傾山逕洛  
和城南洛和水出和溪逕黑水城而北注白水此一洛  
也又有平洛水出玉女臺下平洛澗注於潁是亦洛水  
也鵲南溪水注于洛水洛澗北歷秦墟下注淮謂之洛  
口此又一洛也琅邪臨沂縣有洛水注之洛水出太山  
南武陽之冠石山此又一洛也圖書編引延安洛記云

洛水出慶陽府環縣即古洛陽縣也經延安府甘泉縣  
即古雕陰縣也經鄜州宜君縣子午嶺至中部縣入西  
安府界經耀州及同官縣至富平縣合沮水歷蒲城同  
州至朝邑縣東南入渭沿河三府之人至今皆呼為洛  
河漆沮之名亦不知也古今郡縣慶陽有洛源縣延慶  
有洛川縣及三川洛其一也朝邑有洛苑鄉水經言延  
安形勝云洛水之交漢志亦云雍州其浸渭洛註云洛  
水經北條荆山而東南入渭此尤為明證漢志又云洛

都襄洛皆延安近洛之地略無一字及漆者獨漢上郡志有曰漆垣又不知何所指顏師古曰洛水即漆沮也此後世指洛為漆沮之由豈洛亦名漆與作記者不知鳳輦自有漆沮二水以二漆為一水而莫究其源但云自同官縣界來不知自同官來者洛也一統志遂言同官之漆出自鳳翔不知漆水為涇汭所閒其能飛度涇汭來同官邪秦士往往疑此故詳攷而著之又按粵西柳州有洛容縣雲南蘭滄亦名洛則洛有十一矣

黑水不一 山海經黑水出崑崙西北隅唐書黑水在  
高昌西北顧起元曰黑在大幕北宋謂三姚家族沈括  
云奉使帳宿其下山之土石紫黑似磁下即黑水彼謂  
黑為盧水為龍盧龍即黑水也集韻作黑柳子厚云雍  
西之漆為黑水曾子固言棄糠黑水見于趵突贊寧云  
悉唐即黑溪智按黑水不一北史元魏伐蠕蠕過黑水  
蜀南瀘江亦黑水疑與禹貢入南海不合今又按之黑  
水經三危者屬雍州在沙州燉煌之東南勢亦西流入

南海者屬梁州在滇雲嵩笮之南如所謂葉渝諸川俱黑是也又云崑崙西南有嘉湖分為潞江大居檳榔安義四大江皆折數千里入南海而無源弱水黑水其入流沙而出此乎履按李元陽曰西洱海出浪穹是黑水伏流別派也點蒼山後潯水漾水合而會蘭滄江入南海蘭滄即黑水也其辨曰潞江蘭滄皆由吐蕃西北來潞尚遠蘭滄至交趾入海水內為漢人水外為夷人則禹導惟蘭滄為近孟津會有鬻人在北勝濮人在順寧

地理志南中山曰昆彌水曰洛山海經曰洱水西流入于洛則蘭滄亦名洛也元史至正八年大理勸農官張立道使交趾竝黑水跨雲南以至其國則蘭滄為黑水明矣三危山不在麗江當亦不遠蓋隴蜀滇鼎立隴則西南斜長入蜀滇則西北斜長近隴蜀則尖長入隴滇之間正如三角旂黑水之源正在旂頭故雍以黑水為西界對西河而言也梁以黑水為南界對華陽而言也其大所言分為二而不俱南流或所引四大江出于流

沙南一湖者其弱水之伏流出乎中履尚有一疑岷江旁合馬湖緬甸之金沙江為江水之源而黑水之源與隴雍近則無乃穿金沙江而過如溢為榮之例乎抑黑水之源止於馬湖緬甸之內乎抑金沙江曲入吐蕃而迴入馬湖合青芊與岷乎如此則黃河源大江源黑水源皆崑崙南幹脊上之南北分水乎俟考

龍門之名不一 水經注魏土地記曰梁山北有龍門山大禹所逮通孟津河口廣八十步巖際鐫踪尚存有



廟祠前有石碑三一碑可識太和中立括地志龍門在同州韓城縣北五十里近黃河禹所鑿禹貢正義云龍門在馮翊夏陽縣北禹鑿以通河東郡之西界也而史記正義乃云徐州龍門縣何也如以名同水經注陳留汧水東龍門故瀆出焉屈原過夏首顧龍門郢之東門也今廣州府有龍門縣保寧府昭化縣鄖陽府延平尤溪縣沔縣峨嵋縣大同宣府山陰縣皆有龍門山漳州漳平縣有龍門洞廣西賀縣有龍門灘鞏昌成縣有龍

門鎮其名山衡廬台宕以龍門名者不可勝數姚文燮  
曰黃河自積石折入北方界中二千餘里若韋精以下  
其間險峻如龍門稱龍門者不知凡幾惟壺口以南乃  
為禹所鑿所謂懸崖千仞聲若萬雷者是也

夾右碣石入于河非長城所起之碣石也 平州石城  
縣西南有碣石即漢右北平郡驪山縣水經注曰驪城  
枕海今歷久為水所淪入海去岸五百餘里此則禹貢  
夾右碣石入于河之碣石也山海經碣石之山繩水出

馬注在遼西臨渝縣南水中秦皇刻碣石處通典碣石  
山在漢樂浪郡遂城縣長城起于此山東截遼水而入  
高麗遺跡猶存此則又一碣石也今以平州之赴海者  
為右碣石以高麗中為左碣石漢武東巡海上亦至碣  
石今永平昌黎有碣石山撫寧孤山亦碣石也孫閣輔  
承宗復關外八城議守覺華島即截遼水之碣石舊云  
入高麗乃可以入高麗耳

江南為夢江北為雲後人或合稱之郭景純注爾雅以

岳陽巴丘湖為楚之雲夢非也筆談曰舊尚書禹貢云雲夢土作乂太宗時得古本尚書作雲土夢作乂詔改從古予按孔安國注雲夢之澤在江南不然也據左傳吳人入郢楚子涉睢濟江入于雲中王寢盜攻之以戈擊王王奔郢楚子自郢西走涉睢則當出于江南其後涉江入雲中遂奔郢則今之安陸州涉江而後至雲入雲然後至郢則雲在江北也左傳曰鄭伯如楚王以田江南之夢杜預注楚之雲夢跨江南北曰江南之夢則

雲在江北明矣元豐中予自隨州道安陸入於漢口有  
景陵主簿郭思者能言漢沔間地理亦謂江南為夢江  
北為雲予以左傳驗之思之說信然江南則今之公安  
石首建寧等縣江北則長沙監利景陵等縣乃水之所  
委其地最下江南二浙水出稍高方土而夢已作又矣  
此古本之為允也智謂存中說是然因其同為湖浸或  
亦通稱如子虛之雲夢必謂一澤也至吳人入郢之郢  
乃今江陵存中以為安陸誤矣李軌讀雲夢平聲燮云

地志雲夢在江北德安涓水左右諸湖是左近山稍高  
為夢跨江南北者言跨江涓非大江也

孟諸一作盟豬即孟豬望諸在虞城 東坡有去杭十

五年後遊西湖詩斷章云誰憐寂寞高常侍老去狂歌

憶孟諸高適有兩詩言孟諸其一云朝臨孟諸上忽見

芒碭間赤帝終已矣白雲常不還其後又有封丘詩云

我本漁樵孟諸野一生自是悠悠者乍可狂歌草澤中

寧堪作吏風塵下東坡所用乃後一篇也左傳孟諸之

糜爾雅作宋藪孟諸職方氏青州藪澤望諸禹貢作孟  
豬古文作盟豬在梁國睢陽即今歸德府虞城縣揭衷  
熙曰禹時為濟水所被故曰孟豬

淮源在信陽而入海在鹽城今為黃河所并矣 淮水  
出信陽州胎簪山過唐州桐柏山歷光蔡潁壽盱眙至  
淮安鹽城北入海此故道也今并于河丘文莊曰洪武  
二十四年河決原武之黑陽山壽州正陽鎮而全入于  
淮正統時又決滎陽至懷遠入淮淮獨當大河又況加

清口之沁泗沂哉賈讓上策不能行而歲費數百萬智  
謂不如聽之聽之而上策乃可行也崇禎壬午賊決河  
灌開封城守且年亦以河為救而汴城為河矣文莊若  
在不更嘆乎此固古今之變郎仁寶曰淮源當依禹貢  
出桐柏山不可依水經出胎簪山胎簪低于桐柏百餘  
丈源又小智以為凡水之源皆小愈合而愈大禹貢亦  
就所見言之耳桐柏胎簪皆源也若江不源金沙而止  
源于岷豈足據哉



漸江卽淞江也 水經有漸江山海經有淞江莊子曰  
淞河秦始皇至錢塘臨淞江吳越春秋曰越王至浙江  
之上望見大越山川重秀天地再清漸與浙淞異文耳  
避暑錄話曰桑欽水經兩淞獨略欽北人未嘗至東南  
但取山海經為證爾山海經三天子都在彭澤安得至  
此今錢塘江乃江北之下流雖自彭澤來蓋衆江所會  
不應獨取此一水為名漸卽淞乎智按水經曰漸江出  
三天子都注云山海經謂之浙江地理志水出丹陽黟

縣漢志注云漸江水出南蠻水而郭璞注山海經曰浙江出新安縣南蠻東入海今錢塘浙江是也黔即歙也今始分為二縣三天子都今率山張公山也右水下饒州彭蠡左水注浙江南有博江江有靈鼓成帝鴻嘉封廣德國漸江逕遂安縣有四十七瀨而合桐谿又合於潛縣北之天目山水過杭入海葉少蘊不知三天子都為徽州率山故誤謂自彭澤來耳

什谷即洛汭

張儀曰塞什谷之口即洛汭

而銳也河

南府鞏縣洛水東經洛汭北對琅邪渚入河又名洛口  
又名什谷山海經曰洛水成皋西入河以鞏縣或屬成  
皋也什一作尋書曰涇屬渭汭孔氏曰水北曰汭職方  
氏雍州之川涇汭鄭氏曰汭豳地詩云汭隄之即左傳  
曰會于漢汭以相入為說康成依職方以汭為水名所  
引詩今本作蒹葭毛氏曰蒹水厓也陸氏曰蒹本作汭  
水之外曰蒹漢志蒹水出古扶風汧縣職方之汭自為  
水名智按本以內為汭之義而因為水名康成不善說

耳

聖水今瑠璃水也 水經注聖水出上谷有白魚出穴  
逕玉石山過良鄉縣合大防山之水又合樂水桃水淩  
水涿邪水孫汝登曰即今琉璃河其盧溝即桑乾與濕  
水也范文穆成大使金過涿州詩曰琉璃河上看鴛鴦  
即此地

潦涪即桑乾也 桑乾水即潦涪水潛承大原靜樂縣  
之天池伏流至馬邑從雷山陽發為渾泉天池澄渟鏡

淨若朝那之湫淵有人以車墜池而獲于桑乾伏流也

靜樂為唐管州有管泠山濕

一作濕

水出雁門陰館縣過

代郡桑乾縣南會桑乾水又會如渾水羊水崞水過鉅

鹿會居庸清彛水水經云過廣陽薊縣北道元曰薊南

七里有清泉河蓋水經誤矣此即濕水同流也孫汝登

曰廣陽今京師薊州今大興大興為京師首縣則一處

也武王封堯後於薊封召公即于此秦滅燕以為廣陽

郡今之薊則古之漁陽也清泉河上承桑乾河東與潞

河合入漁陽而枝分諺云高粱無上源清泉無下尾是也

沈水乃沔水也 水經渭逕渭城南而沈水注之注云渭城即故咸陽漢高更名新城武元鼎二年別為渭城沈水承皇子陂於樊川逕杜伯冢下杜城與昆明池水合過璧玉門而北流注渭亦謂是為滴水也呂忱曰滴水出杜陵說文滴涌出也顏籀曰此即今沈水字本作沔與沈相似人因名沈水丁度作沔滴與沔聲通而訛

也天文志暈適背穴孟康曰穴或作鑄此可證也滴音訣

希水口今皖之張家灣也水經注希水口水出潛縣霍山西麓所謂天柱山即皖公尖也曰希湖即石門湖也

唐紇口今所謂整山也水經云資水出零陵都梁縣路山注云出武陵無陽縣界唐紇山逕武岡縣縣乃分都梁之所置也以與無陽相鄰則羅公山近之羅公洞

口水今為西潰整之水為東潰又合夫夷水而下寶慶  
即古邵陵也紕即糾字經云過夫夷縣誤矣土人呼夫  
魚水經夷望溪即今常德魚網溪

瓠岡即瓠子無定河即圓水三戶城在內鄉漢壽在廣  
元 陳後山曰瓠子在雷澤土人謂之瓠岡唐志銀州  
載無定河即圓水三戶城在南陽內鄉西南春秋時即  
有此城漢壽在保寧府廣元縣關公封亭侯者此也越  
絕書言范蠡生于宛索徐文長言范蠡生于三戶城則



三戶其宛索乎

澧注於澠非澧州之澧也南陽衡山非南嶽也澠水即  
澠水也 水經注南陽雒衡山即山海經所云衡山郭  
璞以為南岳非矣汝水條下有澧水逕葉公廟北山海  
經曰澧水東流注于澠水孫汝登澠或作親按當為澠  
澠水今在南陽

鴻溝官渡也今汴河也汜汜古通而後別也 河渠書

滎陽下引河東而為鴻溝文潁曰即官渡水也蓋為二

流一南經陽武為官渡水一東經大梁城即河溝今之  
汴河是也或曰始皇疏鑿以灌魏然蘇秦已言鴻溝矣  
荻荂渠自滎陽五池口東注之鴻溝即出河之溝官渡  
在中牟臺下近時屬河陰縣地有鴻溝其云官渡臺者  
袁紹起土山以逼壘魏武亦起高臺以捍之即中牟臺  
也今陽武縣在官渡之南官渡之西南為滎陽成皋汜  
水厰倉虎牢按成皋今為汜水縣滎陽故東虢國秦置  
厰倉楚漢戰京索間是也漢高帝即位汜水之陽則在

曹州汜水音杞若侯表汜鄉侯何武則音凡韻會汜在  
陟韻曰汜鄭地在許州襄城縣漢高即位汜水與漢史  
傳汜邑汜勝之皆音凡而汜在紙韻江有汜水別復入  
也與日入濛汜同音又水名在成皋縣皆音杞智曰成  
皋之汜非漢高即位處邪互引而別其形音何也春秋  
天王出居鄭汜注音凡此謂南汜秦與晉圍鄭軍汜南  
此東汜也毋乃古一字互寫而後別之又誤別之乎史  
記索隱載汜音有四音梵音凡音杞音圮智按杞圮偶

通互而汜汎形訛故說文以汜汜別之書仲丁遷于囂  
詩搏獸于教左傳晉師在教鄆之間二山名教在滎陽  
西北臨河有太倉曰教倉在石門之東北臨汴水漢高  
因教倉築甬道下汴是也汜水縣古東虢國鄭之制邑  
漢之成皋襄二年城虎牢即成皋也地理志注穆天子  
傳云七萃生捕虎獻天子天子畜之東虢曰虎牢

孔明渡瀘非今之瀘州也 升菴曰瀘州古之江陽而  
瀘水乃今之金沙江即黑水也其水色黑故以瀘名之

從吐蕃可跋海入西洱河曰漾濞水又出會川乃為瀘  
水沈黎古志孔明南征由今黎州路黎州四百餘里至  
兩林蠻自兩林南瑟瑟部三程至雋州十程至瀘水瀘  
水四程至弄棟即姚州也今之金沙江在滇蜀之交一  
在武定府元江驛一在姚安之左卻據沈黎志孔明時  
所渡當是今之左卻也瑟瑟一作虱琶兩林今邛部長  
官司按一統志屬四川行都司

水經叙大江過會稽餘姚入海此桑君長之大誤也

水經舛誤酈道元亦屢辨之至于敘岷江水至豫章口而止及叙沔水當自漢口入江而止乃言其過中渚石城分為二江是大小失倫矣江淮河濟為四瀆謂獨為主也今顧以沔為瀆而岷江附之失矣二江謂一為焦山下海之江一為丹徒向姑蘇之小河大小混稱更失矣若叙沔至石城分為二其一過毗陵而南江過寧國又與桐水合此皆不能通又曰松江出焉崎分三江口又東至會稽餘姚縣東入于海此大誤矣酈道元全不

能正其失而又曰南江枝分歷烏程南通餘杭縣則與  
浙江合闕駟十三州志曰江水至會稽與浙江合此尤  
誤極浙江即漸江自為一水豈與蘇松嘉湖之水相通  
乎桑鄺皆在北方宜其誤耳鄺好傳會紀異聞舛錯不  
少如揣擬天台赤城之流誤引彌明為翳桑之餓可盡  
舉乎

墨子相如郭璞孔安國之言江湖皆未考也 上林賦  
敘水入川東注太湖郭璞江賦云注五湖以漫漭灌三

江而端沛墨子曰禹治天下南為江漢淮汝東流注之  
五湖孔安國曰自彭蠡江分為三入于震澤後為北江  
而入于海此皆未詳考

鬱水出廣信東入海此應劭之誤也 山海經曰鬱水  
出象郡東南注南海入海入項陵東南者也應劭曰鬱  
水出廣信東入海水經注曰言始則可終則非矣智謂  
言始亦非蓋漢之廣信為交州治所即今之梧州也鬱  
亦非今之鬱林州其水合牂牁而來即今左右兩江于



梧州始合府江則鬱水至廣信與灘水合而下端州廣州入海豈始於廣信乎

唐志總載水數本水經注也 唐六典水部掌天下川瀆陂池之政令凡天下水泉三億三萬三千五百五十九其在中國江河大水也百三十五水是中川也千二百五十二水是小川也桑欽水經所引天下之水百三十七江河在焉酈善長注水經引其支流一千三百五十二唐志水經桑欽撰舊志則云郭璞撰隋志與通典

水經無名氏考儒林傳桑欽君長漢成帝時人經云永安順帝更名是順帝以後纂序又考經云武侯壘乃孔明也河水北薄骨律鎮城元魏鎮名也智謂後人沿加耳後漢書注尸佼二十篇一篇言九州水泉所起金蔡伯堅子珪著水經補亡四十篇或云水包地外出地中天下川源處處有之安可悉數如嶺外之左右江發源滇黔經流兩粵受二十餘水折三四千里而南入于海其勢與淮等可為一大瀆禹時無割湯之虞亦未詳及

然中國所見者悉東南流耳其在崑崙西蒲昌海折八  
千里西入北高海飲馬土刺旺吉阿魯札黑金山陰山  
諸水在沙漠外折六七千里入北水海安義河係嘉湖  
西派亦受三十餘水折三千餘里西南入榜葛刺海此  
皆見其源而不知其尾者余作禹書經天合地圖參泰  
西地球畫度補入之

通雅卷十五

欽定四庫全書

子部  
通雅卷十六

詳校官中書

臣朱文翰

員外郎

臣

牛稔文覆勘

總校官降調編修

臣

倉聖脉

校對官中書

臣

高中

謄錄監生

臣

錢黃照

欽定四庫全書

通雅卷十六

明方以智撰

地輿

地名異音

雍州與雍奴雍丘俱去聲今梅氏音平聲 雍奴今順天府武清縣黃直翁音於容切水經曰四方有水曰雍不流曰奴寇恂封雍奴侯雍丘晉屬陳留古雍國杞國今為開封府之杞縣故城臨汴祖逖為豫州刺史治此左傳郟雍曹滕杜氏曰雍國在河內山陽縣西今懷州

脩武縣是懷慶府矣或古雍國地寬耶雍通作邕雖籀作邕

作邕

殺邕縣名在馮翊者殺都外切師古音丁活反邕音羽又音戶說文殺從示攴攴也引詩何戈與殺一說城郭市里高縣羊皮有不當入而入者暫下以驚牛馬名曰殺殺邕馮翊屬縣前漢郊祀志鳳皇集殺邕毛晃曰監本从衣誤今西安府之耀州與同官縣及延安府之宜君縣皆其地也江休復曰趙師民自耀州過同州說

設祠城有設祠廟疑是一兵械其秦禱兵之祠乎又按王厚之印譜有設祠丞印祠作木

鄜州音孚左馮翊縣今屬延安府者 說文作鄜鹿與鹿聲皆不諧不知其故智謂古孚與包通聲鹿與包近故有孚音

盤屋音周室漢縣今屬西安府者 山曲曰盤水曲曰屋五柞宮現在盤屋縣盤本義說文引擊也文見血也邵釐土來切一字也漢志稷封釐在右扶風 師古曰

釐讀曰郃今武功縣五丈原即在此鳳翔郿縣亦有五丈原亦有釐亭

郿陽郿音合古鞏國今為西安府之同州 集韻鞏或作葉通作嬖史注在陳留又按鳳翔之郿亦古郿地魯有郿鵠鵠在涇州漢屬北地郡作鵠鵠城在平涼府之靈臺縣 靈臺周密須國也蒙恬築長城時鵠爵奠祭有鵠集鵠上因名平涼漢安定朝那也慶陽府秦之北地今一統志以鵠鵠屬安定必有疎略矣



郁郅屬北地郡 注泥水出北方界中有牧師苑官今  
慶陽安化縣漢郁郅也慶陽有環縣環縣有靈武臺肅  
宗即位於此環蓋古朔方地也寧夏有靈州城隋置靈  
武郡亦云肅宗即位於此寧夏衛屬朔方赫連勃勃都  
此

浩亶孟康音合門漢屬金城今臨洮府之金州也 靖  
鹵衛亦屬金城金城又有令居枹罕二縣因羌名也令  
音憐枹音夫今河州衛隋曰枹罕

樂涇音官酒泉郡所屬縣 又有天祿縣隃音衣酒泉  
今之肅州衛也

緬陽音固屬五原郡 五原謂龍遊原之地干原青嶺  
原可嵐原正原橫槽原

九變音宗山在馮翊谷口 相如賦曰夷變築室今醴  
原縣屯留縣有三變山篆作𡗗從變非

莫黥丁葛反五原郡之屬縣 今延安府神木縣即漢  
五原河西地本秦九原改為五原

褒余即褒斜 漢志武功縣斜水出衙嶺山北至郡入  
渭武功今郿縣也梁州記曰萬石城沂漢上七里南口  
曰褒北口曰斜長四百七十里武侯嘗出武功屯五丈  
原即此路也五丈原在郿縣西南二十五里

湟中今西寧也 唐鄯州宋改樂州或讀去聲蓋與潢  
通積水池也

龜茲漢上郡有龜茲縣音丘慈 此因有龜茲國而名  
也詳見外國名條

邾縣音夾屬汝州 此乃楚公子圍葬邾敖於邾杜氏  
曰屬襄城宋為潁昌府邾縣今時之汝州邾縣也邾鄆  
說文曰河南縣直城門宮陌地在臨汝即今汝州河南  
府之陝州音閃古西號也篆作𡗗邾篆作𡗗夾從二人  
夾一人也夾以冉切說文曰盜竊懷物也从亦有所持  
或曰字說家所分

不羹楚子城不羹注音郎今南陽府舞陽縣有定陵城  
是其地也 韻會廣韻陽韻皆未收此字殆漏失耳本

作更古陽庚通更讀如岡又轉為郎耳

蕤陽即戲陽戲平聲 光武親破五較於蕤陽注引杜

預言戲陽左傳荀盈卒於戲陽今彰德府城東有戲陽城

澠池澠音勉漢屬弘農今屬河南府 即永寧縣亦澠

池地溜澠之水澠則音繩在今青州府又漢江夏郡有

郾縣母杏切又作旨冥阮塞皆郾也王伯厚郾阮冥

皆音萌正與旨音近

閩鄉閩本作閩無分切訛為受 弘農湖縣有閩鄉今為縣屬河南陝州唐之鼎州也旻火劣切目使也又忽域切則與具通閩恤皆一音也郭璞作汝授切非

緱氏緱音溝今河南府偃師縣有緱山輟輶山 左傳藥盈過周王使候出輟輶注曰緱氏縣東南所謂武關者則在西安府之商州左傳楚司馬起豐析以臨上雒使謂陰地之命大夫曰將通于少習以聽命杜注少習商縣武關也貨殖傳南陽西通武關鄖關武關秦之南

關也今人或指緱氏之轘轅為武關則誤矣

大誓山作大苦 山海經大誓之山多瑋瑋之玉其陽  
狂水出焉有三足龜食之已腫水經注作陽城大苦口  
狂水經綸氏縣南

濯陽縣屬汝南郡 應劭曰濯水出吳房東入瀕瀕七  
谷切汝南今為汝寧府吳房今遂平縣也汝南有鮦陽  
縣孟康曰鮦為紂紅反今新蔡有鮦水方子謙上聲音  
紂誤詳見疑始

潘鄉即寤 孫叔敖子孫所封寢丘也漢志作寤世祖  
更名固始今屬汝寧之光州延熹三年立叔敖饒碑封  
于潘鄉即固始

潏疆潏水名一作潏又作潏於謹切 說文曰水出潁川  
陽城少室今登封縣東至今陳州商水縣入潁隋之潏州  
則又在汝陽縣

涅乃結切 從曰土作涅非上黨有涅氏縣因涅水名南  
陽亦有涅南縣亦因涅水四川亦有涅漢志益州郡銅



瀨縣注有談鹵山迷水所出東至談藁縣入涅

縣壅山一音甕 水經注晉水出縣雍山箋曰孫云壅  
山海經作雍音甕

蔚州音鬱今屬大同府 又西魏蔚州是今慶陽府合  
水縣又後魏蔚汾在今岢嵐州之興縣岢嵐音可藍

崞縣崞音郭今屬太原之代州 九域志有崞山地理  
志名山無崞山而有五臺山道經以為紫府內經以為  
清涼山也今代州仍有五臺縣漢之慮虎也與繁峙接

界峙音止本漢縣地理志作峙今仍之

方與音房豫左傳城郎注杜預曰高平方與有郁郎亭今澤州高平縣戰國之長平漢之涇氏也秦破趙長平即此顯德元年次澤州及劉旻戰于高原敗之追及于高平又敗之魏相封高平侯又平涼府固原州漢高平據漢志方與縣在山陽郡房豫晉灼之音也

陽夏夏音櫝馮異封陽夏侯陽夏地名尚德論曰太康被羿所距營陽夏城居之今拱州太康縣是或讀如字

後人後數瓦切梅氏音鎖本音雖 卽菱字妄也後人  
縣屬上黨郡絳侯世家霍人注音鎖樊噲傳霍人注作  
後人蓋霍本有雖音見文選注

涑水涑息錄切音疎 呂相絕秦曰伐我涑川杜曰出  
河東聞喜縣今解州聞喜縣是至蒲州入河今光山有  
涑水書院涑水司馬溫公別號光父池為邑令時生光  
于此轉注略涑音疎

沁音侵去聲 沁州沁源縣澤州又有沁水縣沁州是

晉銅鞮也

曲逆舊音去遇當如字 平城圍解高祖南過曲逆改  
陳平戶牖侯為曲逆侯音去遇顏之推譏之據孟康曰  
中山蒲陰縣又有曲遇曹參傳破楊熊曲遇攻雍釐曲  
音丘羽反遇音顓此殆關中地水經注濡水注博水濡  
水出蒲陰縣回湍曲復謂之曲逆水故縣名曲逆哀四  
年齊國夏伐晉取曲逆即漢高帝擊韓王信自代過曲  
逆之地也章帝章和二年以名不善改曰蒲陰焉今澹

園與朱光家張位李登猶以曲逆當音去遇耶或曰今保定之完縣乃曲逆侯國

乾侯音干

左傳注疏及杜林合注皆不音漢書注顏

師古音干今廣平府成安縣古乾侯地與乾時

春秋地名

同

音謂其水嘗乾也見水經注說文有鄣因此立字耳

襄賁開陽二縣地理志屬東海郡賁音肥

廣記襄賁

廢入沂州臨沂縣沂魚巾魚衣二切今沂州屬兗州府後魏北徐州隋臨沂唐琅琊也開陽本鄣國春秋叔孫

州仇城啓陽漢避景帝諱改開陽復廢入臨沂荀卿子說齊相曰楚人則有襄賁開陽以臨吾左是也今徐青之水以沂名者三惟出太山者為大酈道元謂一出尼丘徑魯之雩門一出太山之冠石山一曰沂過臨沂之東承縣之西下邳縣入泗以智考之與河泗合也泗在黃河南沂在河之北豈得言入泗乎賁之音肥以墳音轉也

新鄆音妻 又十六年盟於鄆丘應劭曰秦伐魏取鄆

丘漢興為新鄆蘇秦說魏曰南有新鄆則非漢改是名也後漢郭竟封新鄆侯注屬汝南郡故城在今潁州汝陰縣西北今汝寧府商城縣漢新鄆也潁州宋為順昌府即漢之汝陰今雖分屬鳳陽然正與汝寧商城連界又漢廣漢郡有鄆縣史記注鄆丘又音七系反今之潼川州射洪縣正漢鄆縣地射音食

洹水洹戶干切 傳曰濟洹之水杜氏曰水出汲郡林慮縣本隆慮避殤帝諱音林間洹水入張甲河至修入

漳項羽與章邯盟洹水南殷虛上林慮今亦屬彰德府  
後周分相州臨漳界置洹水縣後省入大名府成安今  
魏縣古洹水也山海經神囷之山黃水出焉東流注于  
洹隋圖經謂安陽河即聲伯夢涉之所

潢川直几切 光武敗莽兵於昆陽大雨潢川盛溢出魯山南  
經昆陽城東北至潁陽定陵入汝陽處父與楚子上夾泚而軍  
泚即潢字昆陽城在今南陽府之葉縣葉音攝泚則直  
尼切水出常山入河斬陳餘泚水是也



關與韓地關音馬與去聲胡三省音關為遏正義秦韓相攻於關與而趙奢破秦軍郡縣志關與山在磁州武安縣今磁州屬彰德府又郡國志上黨涅縣有關與聚括地志曰今名烏蘇城在潞州銅鞮縣銅鞮宋之威勝軍今為沁州沁州之武鄉縣即漢涅縣地又儀州和順城亦云韓關與和順春秋榆城儀州即今遼州如耳曰魏伐趙斷羊腸拔關與是也羊腸正義云太行山阪道名南屬懷北屬澤按秦上黨郡今澤潞遼沁四州之

地兼相州之半韓總有之至七國時趙得遼沁韓猶有  
潞州及澤之半半屬趙魏沁州在羊腸之西遼并代三  
州在句注山之南今太原晉陽西北通河西上郡關曰  
羊腸坂是通典太原陽曲縣有乾燭谷即羊腸坂後漢  
鄧訓傳注今嵐州界羊腸坂是也隋煬登太山問崔謁  
對曰上黨壺關縣有羊腸坂又皇甫謐地書云太原北  
九十里羊腸坂戰國策說秦曰西攻脩武踰羊腸郡  
縣志羊腸在太原交城縣東南五十三里是有數羊腸

坂

句注句音鈎其音章句之句者非也山在代州雁門縣西北蘇厲曰齊反垆分先俞於趙正義垆音邢分當作山括地志云句注山一名西陁山俞容朱切爾雅西隄雁門是也郭注曰西隄即雁門先西聲相近白虎通曰西方者遷方也

漳滏屬磁吳起曰殷紂之國左孟門而右漳滏注云水熱若出於釜故名滏今在磁州清漳出沾山大要谷

今太原府平定州樂平縣少山也樂平即漢沾縣濁漳  
出潞安長子縣鹿谷山即發鳩山東至彰德府入清漳  
九域志冀州衡水縣長蘆河即禹貢衡漳之故瀆也洺  
水至廣平永年縣東南二十里洺漳合流二漳本入河  
河南東徙漳遂專達於海趙王謂公子成曰吾國東有  
河薄洛之水徐廣曰安平經縣西有漳水津名薄洛津  
袁紹在薄洛津聞黑山賊信是也按漢信都安帝更名  
安平通典貝州經城縣宋省入大名府宗城縣在此時

為廣宗縣屬順德府漳有十見前

番吾即蒲吾 蘇秦曰秦甲渡河踰漳據番吾則兵必  
戰于邯鄲之下矣括地志蒲吾故城在鎮州房山縣東  
今之真定府平山縣即漢蒲吾也番當音蒲史記番君  
音婆嶺南番禺音潘

鄆城音絹屬濮州 古顓頊之墟曰帝丘夏昆吾氏所  
居春秋衛成公都此漢鄆城隋濮州今仍為濮州屬東  
昌府魏武之興全賴荀彧為守鄆城呂布攻鄆城不下

西屯濮陽操曰布不能據東平斷亢父泰山之道吾知無能為也濮陽今屬大名之開滑昆吾之伯想兼有之亢父屬東平國正義曰故城在兗州任城縣今之濟寧州也沛公還軍亢父光武征龐萌至亢父

于越即於越作干者非也荀子勸學篇于越夷貊之子注于越猶言吳越呂氏春秋荆有飲飛得寶劍於于越高誘曰于吳邑也方子謙收入寒韻作干智按是于字于粵猶句吳也王會篇曰於越納補注曰春秋定哀

三書於越漢書于越注于發語聲子謙或據前人小說  
須知與𪔐鳩同誤耳

澶市連切衛地 杜氏曰在頓丘縣南今名縣汚衛地  
也汚音紆宋禦遼于澶淵今大名府開州滑縣是古衛  
地頓丘一作敦丘亦其地也

平谷音裕 問奇集曰裕峪同今屬順天府梅氏峪音  
育廣韻韻會諸書皆無峪字智按北人呼谷為裕猶呼  
綠為慮也

郟縣貫縣屬鉅鹿郡 師古曰郟若么反貫式制反王

子侯表貫鄉侯平音式制反當是貫字訛為貫也

督亢音剛 燕丹獻督亢圖水經注涑水一名巨馬河

合流督亢溝水耗則伏而顯於迺縣包方城縣為督亢

澤涿志有督亢亭固安縣有督亢陌督亢澤南為白溝

水又鳳陽懷遠縣有督亢城

迺古迺字屬涿郡 亦見侯表朔方郡又有呼迺縣

蓐音條 河間府景州春秋晉條地漢廣川隋蓐縣高



允封隆之皆修人

澗水音輦即沅水 山海經王屋山澗水注於泰澤水  
經注箋引此澗水智謂即沅見前充濟條

宛胸音寬劬今曹縣 蘄歙以中涓從起宛胸歙音翕  
徐廣曰煮東城在宛句大宛國之宛南陽縣之宛縣皆  
音駕

莊平音之疑切今屬東昌府 漢東郡有莊平縣泰山  
郡在莊縣今訛為莊音持貨殖傳山不莊藥師古曰古

槎字也

單父音善甫 呂覽言宓子行其術于亶父猶禪禪壇  
壇之類可知古亶單皆有二音必讀善甫者亦一儒之  
音釋也

甌縣音堅屬東萊郡 有鹽官呂忱為甌令今通考引  
用皆省作弦

費縣音秘音蜚 後為姓或作酈潰趙明誠曰費長房  
費禕音蜚琅邪費氏音秘

紇屬北海郡 師古曰即執字北海又有平的縣

樂水盧谷切又郎狄切 魯會齊侯于樂杜曰水在厯

城西北入濟說見濟下問奇集音粕兗州府東平州梁

山樂當音泊

負尾即陪尾 泗水出兗州府泗水縣陪尾山經曲阜

滋陽濟寧又韻會陪尾山漢地志作倍尾江夏安陸橫

尾山水經注洛水過五零陪尾北與澗瀍合今德安府

城東北有陪尾山三輔黃圖黃陽宮黃音倍可知古通

用矣

乘丘千乘皆去聲 今濟南府濱州漢千乘地爾雅如  
乘者乘丘注形似車乘謂稻田塍埒莊十年公敗宋師  
于乘丘屬漢泰山郡集韻塍埒埒即說文之塍

鄆城音運 今屬濟寧府乃漢廩丘地隋為鄆城唐為  
鄆州東平州則隋之鄆州也青州沂水縣乃春秋鄆邑  
古今錯亂大為難記如濟南府齊河禹城縣皆漢祝阿  
地而祝阿城乃載於長清長清又載為漢盧縣地武王

封黃帝後於祝在此如鄆城為漢廩丘而廩丘城又在  
東昌府之范縣至廩延則是酸棗今為開封延津縣漢  
志琅邪郡東莞莞音官故鄆城有術水即沭水也今廣  
州又有東莞

吾山在東阿縣吾音魚 漢武瓠子歌云功無已時兮  
吾山平即此瓠子曰宣房在大名開州其下流經此漢  
東海郡有郛鄉縣亦音魚

濕即漯他合切 說文曰水出東郡東武陽元為開德

府朝城縣今朝城屬東昌府之濮州本商王畿地也漢志作漯禹貢浮於濟漯累於他合之音難諧漢平原郡有漯陰縣佩觿集曰有以水名之濕為下濕者六書故曰繇說文曰從日絲微杪也從日中視絲古以為顯字或曰讀若隤或以為繭繭者絮中徃徃有小繭也孫氏五合切疑此即繭而又讀若榻漢碑溼漯多通詳見襍說

不其如淳音基縣屬瑯琊郡 有太乙祠明堂弱侯論

不字如粵

斗鄆即斟鄩故城在青州北海郡 今斟灌城在壽光

縣東地理志作斗今斗城是

黃堍賈魯河道 自黃陵南達白茅放於黃堍等口即

今賈魯河故道也白茅在曹縣黃堍在單縣萬厯丙申

黃堍河決由賈河故道出符離集等處蓋即元人所挑

矣

濡水音乃官反 漢志遼西肥如縣注青水東入濡水

入海陽王莽曰肥而師古曰濡乃官反今字書韻書皆無此音

軟音大屬江夏 漢王霸子符徙封軟侯後漢書作軟音夫智按說文軟特計切韻會引漢地理有軟縣徒蓋切而唐韻韻會銑韻無軟字可知軟訛

洙水出茶陵縣 地志謂之泥水洋湖所注也上有峨山酈道元詠曰登武陽觀樂數峨嶺千蕤洋湖口

樂浪音狼 漢置元菟樂浪樂浪有訛邯縣訛音男後



漢王景八世祖仲以濟北王興居反欲師仲仲奔樂浪  
家於訥邯又有不而縣而或音倪又有黏蟬縣服虔曰  
蟬音提

錫縣漢屬漢中之縣應劭音陽 師古曰即春秋所謂  
錫穴也隋曰鄖鄉唐曰南豐曰浙川此時為鄖陽府今  
一統志音釋不詳何怪時人之呼為錫耶弘農郡注有  
甲水出秦嶺山東南至錫入沔即此也譙周子同為錫  
令

恨山縣屬武陵郡音恨 出藥草蔡邕傳卓自恨用恨  
當與狠同篆當作𦏧王莽兒恨元命包曰愀然恨然注  
戶懇切

茶陵屬長沙國小顏音弋奢反 益知古人呼茶為塗  
而古之茶即茶字也

潁水出豫章艾縣 左傳吳公子慶忌諫夫差不納居  
於艾是也水過長沙羅縣積為町湖

郁郅水經注音存罵漢縣屬犍虔音虔為在朱提音提旁 六

書故作孱駢則王莽時改也犍為屬嘉定之縣古為郡  
名如馬湖府及叙州之長寧縣眉州之青神縣即青衣  
皆屬漢犍為犍為有牛鞞音鞞縣劉裕遣臧熹同朱齡石  
入蜀譙小苟塞打鼻熹至牛鞞進攻即牛鞞也青衣禹  
貢蒙也有大渡水至南安入濊音濊高守恒詩犍為牛鞞  
朱存馬豹領蛾眉青合羊亦巧語也証知存馬加邑旁  
耳

冉駝音麗今四川之松潘地也 武帝開冉駝為汶山

郡唐置松州宋為茂州灌疊皆所屬維州在其外

邪龍屬益州孫恂音邪為牽升菴曰孫恂音邪龍為

顛智按唐韻與汧𧈧并列疑是邪之訛

收靡縣味縣皆屬益州李奇曰靡音麻升麻所出孟

康曰味音昧

監町山從陟山皆屬益州益州律高縣有監町山出

銀鈎師古曰監音呼鴟反來唯縣從陟山出銅陟音胡

工反益州又有葉榆縣葉如字人或誤讀為攝有葉榆

澤在東貪水首受青蛉水南至邪龍入僕水又有不韋  
縣智按常璩南中志漢武置嵩唐不韋二縣徙呂嘉子  
孫實之因名不韋以彰先人惡行人歌之曰漢德廣開  
不賓渡博南越蘭津渡蘭滄為他人

胸腮屬巴郡 其地多此蟲遂以為名問奇集音瞿閏  
字彙胸作胸音潤戴氏亦云胸訛為胸也胸尺尹切腮  
爾軫切則瞿閏之音誤矣今夔州府雲陽梁山二縣是  
弓頭音奇譯名 常璩巴志言在胸腮華陽國志言張

儀城江州司馬錯自巴涪水取楚商於之地為黔中郡  
白虎為患有秦精者作白竹弩殺之秦王刻石與盟其  
時號白虎復夷即今弼頭虎子也西漢時有扶徐荊州  
著石楚訪有弼頭白虎復夷又曰板楯蠻即今弼頭虎  
子弼強貌

邾亭居容切

晉郭璞傳有物大如水牛到宣城下璞

卜曰是邾亭驢山君鼠也智按南康志有邾亭湖邾亭  
廟亦作宮亭其廟神能分風景純所言驢山得無即廬

山神乎冷齋夜話載安息王子高安世次邾亭湖廟廟  
神言多嗔至此求為作寺正此地也

剡溪今紹興音閃 見梅氏音注智按古皇剡剡即光  
睽睽音義與閃同

朶猶今之泗州 通典泗州漣水縣漢朶猶縣南齊設  
冀州治漣口智按郡縣志沫水俗名漣水今沭陽縣也  
漢之朶猶今泗州也春秋仇猶國今之太原府孟縣也  
有仇猶城智伯欲伐朶由遺之大鐘即此羅氏路史謂

智伯所伐為漣水大誤矣公由仇猶字通國策作公由史檇里傳作仇猶韓子仇繇高注或作仇首呂覽作公由訛為夙由皆一也

新淦音甘去聲屬臨江府 又姑南切南越地名漢嚴助傳處之七淦說文淦水入船中也一曰泥也一作泠虹縣今呼為絳 水經注溝首對獲世謂之洪溝昭八年蒐于紅杜預曰沛蕭縣有紅亭即地里志之虹縣王莽所謂貢也漢碑曲紅即曲江貢虹紅洪相通可証以



知北魏時三江猶屬東冬同音矣

鄆音多沛郡之縣 功臣表有鄆侯師古音多智以為  
此單音之轉

虔亭虔音逞吳地 蘇峻亂立大業曲阿虔亭三壘胡  
身之作丑升反

龍允音奪 見張位音注史記樊鄴傳戰龍脫在易州  
趙世家孝成王丹十九年趙與燕易土以龍允汾門臨  
桑與燕龍允邢子勵趙記所謂龍山四麓各有穴出風

者也以允或為脫則音脫耳

索臯漢縣與浚遒屬九江郡 孟康音柘姑詳見疑始

羸樓漢縣與龍緬朱戡屬交趾音連樓 見孟康音注

今唐韻先韻中竟造一羸字

差冷即壽冷屬交趾音麋零 馬援傳徵側為麓冷縣

雒將之女韻會引縣名作差冷水經注曰盧容水逕區

粟城與壽冷水合朱謀埠箋曰晉志作麓冷沈約宋書

作壽冷今從宋志

牂牁音近臧戈繫船楸也

漢書作牂牁郡地故且蘭

且音苴沅水所出或作牂牁亦作樁柯常璩作牂牁郭忠恕作牂牁引玉篇繫船大杙也今刻佩觿集編作或或或以或為或升菴作或或言貴州江難渡兩岸立兩杙舟人循繩而渡盤江崇安江皆然因悟古人字義按水經注箋盤江在賁古縣南朱裒之反李恢追至盤江者也此本是監町山水監音呼鵠反訛為盤耳智疑盤訛為監有鼈縣不狼山鼈水所出音蔽又音鼈有句町

縣音劬挺談拒縣拒一作指夢得玉澗禪書曰潯陽記  
郡西松言陶公牂牁伐此樹淵明搜神後記言新淦封  
溪有吳聶友截梓樹板潯牂牁處則此語晉時猶存

同並音伴縣名屬牂牁 漢昭紀同並二十四邑又西  
南志傳牂牁同並漢書亦借並為傍字此並音笨乃並  
之粗屑聲也

越舊漢郡音髓 其縣有邛都定作大作作秦濤街蘇  
示師古曰示讀如祇尼江在西北尼古彛字越舊今為

四川行都司猶有武侯城是五月渡瀘處非泇溪合江之瀘水也

彝人蠻人即今雲南之黑羅羅白羅羅也 又有麼些

禿光些儂人沙人泇河尋丁蠻栗些之類古曰烏蠻白蠻今偏沅之間曰黑苗赤苗

滇邊漢所云靡莫也 元封中以兵臨滇王舉國降

且慮音苴盧又音秋間屬遼西 隆慮以避諱音林間

在河內夏馥所入山也又無慮在遼東取慮在臨淮昌

慮在東海漢志俱音閭取慮音趨閭

爾稽即尼谿 史記孔子世家齊景公欲封孔子以尼谿之田晏子春秋外篇公悅之欲封之以爾嵇即尼谿  
峯山音密 山海經峯山淵明詩乃在峯山陽鄭鄴取  
以為號今廣韻字彙皆遺

亞駝即噶沱一作虡池惡池呼沱惡沱虡勺 史蘇秦  
說燕南有噶沱漢光武紀至噶沱河周禮職方并州川  
虡池山海經泰頭之山共水出焉南注於虡池又禮記

晉人將有事于河必先有事于惡池即庠沱秦穆公伐  
楚詛楚文曰告盟于不顯亞駝大神即滹沱之神韓非  
初見篇中山呼沱以北不戰而畢為燕法言吾子篇浮  
滄海而知江河之惡沱注惡沱淺水也音義同博南言  
山海經庠勺一作多即滹沱也此水自代郡鹵城今繁  
峙也流至參合雲州文安霸州入海光武所渡在定州  
今曰危渡口

焦國即譙國 焦澹園曰焦國名又姓一作譙國名記

焦譙一也江淹詩焦山作譙山可証

什方卽什邡 漢書張良傳漢高帝惡雍齒欲殺之用  
良計封爲什方侯猶言釋放後漢儒林傳楊仁拜什邡  
令注益州縣名音十方

離枝卽令支 史齊世家桓公北伐山戎離枝孤竹地  
里志遼西令支縣有孤竹城離令聲近令音零

儼倌卽肅慎 後漢東譯傳挹婁古肅慎之國孔融傳  
肅慎貢楛矢丁零盜蘇武牛羊文苑傳杜篤論都賦所



稱昆彌儼倭即肅慎按周禮大司馬大獸公之注獸五  
歲曰慎亦作麋禮逐疫與挽歌用倭童倭麋慎互通王  
會又作稷慎史記作息慎後為女真遼興宗名宗真改  
為女直

離隼即堆 前地理志李冰鑿離隼晉灼曰古堆字晉  
胡奮傳作離堆河渠書離隼集韻堆又作匪洎隼升菴  
引周憬碑作犁隼同李冰穿二江者王瑩

苟扇即勾漏 晉書葛洪傳聞交趾出丹砂求為勾漏

令縣名前漢地理志交趾郡有苟屬縣即勾漏

子同即梓潼 王莽自云定命于子同即此地也

山山后偶二音 升菴言宜興漢封蔣澄為山亭侯當  
是函字之省陳懋仁音后今桐城有山山音偶

西洱一作西洱西二西珥 唐鑑玄宗戊寅皮邏閣彊  
大注身之曰洱河即西洱河今作西珥漢志作西洱升  
菴引隋書作西二

五阮即五原 說文阮代郡五阮關也升菴云詩侵阮

祖共即五原之地今作原智按張氏曰阮國名共阮之地名皆在今涇州今有共池詩地理考注云民族略阮商諸侯在涇渭之間漢五原郡邊河西今時延安府神木縣皆其地本秦九原郡漢改五原而絳州遼州皆有九原山乃同名也五阮自為五原而侵阮之阮則別一阮耳升菴想未考也

罷谷音擺 山海經洱水出罷谷山罷皮買切王僧孺姬人怨以罷叶解買余亦謂方言之擺音擺淮南拘罷

亦音擺古蓋有此音

邢即耿 史殷紀祖乙遷于邢索隱曰邢音耿今河東  
皮氏有耿鄉正義絳州龍門縣耿城是則此邢非邢洺  
之邢詩地理考引通典邢州治龍岡縣祖乙遷邢即此  
則杜佑與王應麟皆失考邢邢州今北直順德府存考  
錞于縣屬北海以其形似錞于而名 樂器之圓敦者  
名錞鉦山海經巍山是錞于西海又竹山錞于江注錞  
猶堤錞也敦堆聲近蓋山川之形有似圓堆深甬者如

玉甌峰鈷鉬潭之類

大岷 書至于大伾陸作大岷一作大伾史記作大邳  
豐鎬 漢書傳復居于豐鎬封禪書澧澆有昭明 壺  
鮐即狐貍見檀弓左傳 鄆丘公羊作犀丘穀作師丘  
石經作菑丘

金潏交趾地名 張籍蠻中詩銅柱南邊毒草春行人  
幾日到金潏水經注所謂金潏清渚也今刻本作麟非  
范石湖言交趾鶴扇螺筍貴人坐輓車挂幅內曰抵鷗

上已拋毬曰飛馳其論交趾交脛而今不交則迂矣

鰐得鰐音鹿張掖郡所屬縣今之甘州即張掖也 樸

剗音蒲環武威所屬縣又有蒼松縣古松字 允吾音

鈐牙屬金城今莊浪 楮次音苴咨屬武威郡 渠搜

朔方之縣禹貢渠叟屬西戎而漢縣之 大叟古要字

北地郡之縣也當是叟字 烏氏音烏支索隱曰烏於

然反屬安定郡 昀卷音旬箇二縣皆屬安定郡 蓮

勺師古音輦酌左馮翊地 平輿水經注汝水過平輿

縣朱謀璋曰輿音豫 标氏音拳精縣屬代州 洧陶

即汪字从出从土屬雁門郡 即裴音肥漢縣屬魏郡

今大名彰德地皆漢魏郡也 憖題師古曰憖古莎字

漢屬清河郡 雖替二字工豆莫豆反屬上谷郡 庠

奚庠音題或作蹄屬漁陽郡 獠蔡謩音由又音鴉屬

濟南郡 高原山名壺山浯水所出入淮屬琅瑯原即

柘字浯音吾 盧維職方兗州其浸盧維音雷澦 番

汗音盤寒屬遼東郡 汨羅音密在湘陰縣屈子沈處

徙縣屬蜀郡師古徙音斯 郫水在蜀郡源縣音壽  
母椹與稅同屬益州 岷縣音盛或作郪在紹興又平  
聲亭名在吳 葦里顧野王曰洛陽有葦里音魂又作  
渾升菴音塊殊是

曲紅即曲江見漢周府君碑曾子固言之甚詳 益江  
即烏江見玉篇 無慮即無閭見九域志引醫無慮山

西虞即西吳管子 賁隅即番禺山海經桂林八樹作  
賁隅 櫟榆櫟榆皆葉榆國 荊荼史記引荊舒作荊



茶 戶孫即烏孫國見呂覽 博狼即博浪漢書 貢

渾即陸渾見山海經乃裔之訛 餘汗即餘干漢書

烏亘即烏桓晉書作烏丸 西零即先零 銅瀨即漢

志同勞地在益州見水經注作銅瀨 天苴張儀傳天

苴即天巴 鄮城即訾城左傳注 銅庭即洞庭山海

經 罌罌即之罌見張九齡詩 扶掃即扶漫史記

蕩陰即湯陰九域志 終隆即終南淮南子 陳寔即

陳寶說文引陳寔赤刀 毋野即牧野說文 踰次即

榆次山見山海經 有鄆即有扈史記 剡道即棧道

史記田叔傳 四竇即四瀆周禮注 終髮即窮髮南

荒地莊子 垌澤即滎澤杜預引竹書紀年 八國即

幽國爾雅 邛懋即邛樊漢碑 三陟即三峽見升菴

引字誤 倉吾即蒼梧見汲冢 芮隄隄與鞠同漢地

志注韓詩皆引芮隄之即周禮注作納隄又作坵九乃

上聲毬轉入為鞠故蹴鞠即擊毬 祁黎左傳隱十一

年會時來公作祁黎左文作祁滎陽縣東有釐城 歐

蛇桓十二年左傳盟于曲池穀作泔池公作歐蛇 須  
眇左作伐邾取須句公作須眇 首戴僖五年左會首  
止公穀俱作首戴 泥母左甯母穀作寧母杜注高平  
方與縣東有泥母亭母又音無 訾樓僖三十三年伐  
邾取訾婁公作叢婁穀作訾樓 垂斂左文二年盟垂  
隴公穀作垂斂 斐林宣元年會蜚林伐鄭公作斐林  
注引禮記必將有事于蜚林即配林 無婁宣十五年  
會無婁公作牟婁哀婁作爰婁 賀戎成元年王師敗

子茅戎公穀作質戎

瑣澤成十一年會瑣澤公作沙

澤 茗丘公作招丘

善道襄五年會吳于善道公穀

作善稻

偃陽襄十年滅偃陽穀作傳陽

大鹵公穀

作大原

屈銀公羊屈銀左作厥慙

皋鼬公羊作浩

油 萁蔭定十五齊衛次于萁蔭公作蘧蔭

邨公作

盛 祊穀作會于防公亦作邳

夫鍾作童

奚作郎

譙作部

滑作郎

檉作打

麗作犁作麗

下陽作

夏陽

孟公作霍穀作雩或作宇

緡作閔

蓼作鄆

辰陵作夷陵

鄆作運

鄆作操

郛作詩

桃作洮

祝柯作祝阿

此俱字同音異與音同字異者

通雅卷十六